

Ágrip af sögu skólans

Stöðvarfjörður var gerður að sérstöku sveitarfélagi árið 1905. Kennt var í svonefndum farskóla þar sem einn eða tveir kennarar sinntu kennslu ýmist í þorpinu eða á bæjunum yfir skólaárið. Haustið 1937 var tekið í notkun nýtt húsnæði sem að hluta til var byggt í þeim tilgangi að þar færi fram kennsla (Samkomuhúsið). Þá má segja að kennsla hafi verið komin í fast form og farkennsla heyrði sögunni til að mestu leyti. Það náðist líka festa á mannahald við kennsluna og settur skólastjóri var Runólfur Einarsson, sem sinnti því frá 1937-1964. Anna Þorsteinsdóttir var skólastjóri veturinn 1964-1965.

Kennsla fór fram í Samkomuhúsinu samfelld frá árinu 1937 – 1965 þar til eldri hluti núverandi skólahúsnæðis var tekinn í notkun. Það haust tók Sólmundur Jónsson við skólastjórn og var allt til ársins 1989 þegar Jónas Eggert Ólafsson núverandi skólastjóri tók við stöðunni.

“Nýi skólinn” þótti hinn veglegasti, var 250m² að flatarmáli. Í honum voru 3 kennslustofur, kennarastofa, lítið bókaherbergi, baðklefi og búningsherbergi, allstór gangur, kyndiklefi og 4 snyrtiherbergi.

Þegar fór að bera á þrengslum í skólahúsnæðinu festi hreppurinn kaup á íbúðarhúsi (Bakkagerði, eldra húsið) þar sem kennsla 1. og 2. bekkjar fór fram á efri hæð en leikskólinn var starfræktur á neðri hæð.

Hafist var handa við nýbyggingu við skólahúsið árið 1983. Í fyrstu var neðri hæðin tekin í notkun en vígsla viðbyggingar fór fram á vorönn 1996.

Íþróttakennsla fór fram í Samkomuhúsinu allt frá 1937 til 2000 þar til íþróttahúsið var tekið í notkun. Einnig var kennt á gangi “nýja” skólans og á skólalóðinni. Sundkennsla fór fram á Búðum frá 1945-1960 en eftir það voru börn send að Eiðum í sundkennslu á vorin. Sundlaug var tekin í notkun á Stöðvarfirði árið 1983.

Tónlistarkennsla var ekki í föstum skorðum fyrr en upp úr 1980. Tónlistarskóli Stöðvarfjarðar var stofnaður árið 1987 og starfræktur til ársins 2004, þá var hann sameinaður tónlistardeild Grunnskóla Fáskrúðsfjarðar eftir sameiningu Stöðvar- og Búðahrepps. Skólinn hét Tónlistarskóli Austurbyggðar og var starfræktur á Stöðvarfirði og Fáskrúðsfirði. Eftir sameiningu við Fjarðabyggð heitir skólinn Tónlistarskóli Fáskrúðsfjarðar og Stöðvarfjarðar. Skólastjóri frá 2004 er Valdimar Másson.

Núverandi húsnæði

Stærð nýbyggingarinnar er um það bil 850 m² að flatarmáli á tveimur hæðum og eldri byggingin er 250 m² að flatarmáli. Grunnskólinn hefur þó ekki yfir að ráða öllum þessum fermetrum því Tónlistarskólinn er með aðsetur sitt í eldri hlutanum, skólinn nýtir þó tvær kennslustofur þar fyrir myndmennt og handmennt. Í nýrri hlutanum eru 5 kennslustofur auk heimilisfræðistofu og lítils kennslueldhúss. Einnig er sérkennslurými, tölvuver, vinnuherbergi kennara, setustofa kennara, setustofa nemenda, fjölrými með leiksviði og salernisaðstaða fyrir kennara og nemendur. Bókasafn er á neðri hæð sem er sameiginlegt almennings -og skólasafn. Smíðaaðstaða er í sundlaugarkjallaranum. Fyrirhugaðar eru breytingar á skólasafni á neðri hæðinni og á eldra rými skólans fyrir sér-, smíða-, tónlistar-, hand- og myndmenntakennslu.

Íþróttahús var tekið í notkun 2000 og er það steinsnar frá skólanum og sundlaug er í sérhúsnæði á skólalóðinni.

Skólasafn

Skólasafn hefur verið starfrækt frá 1990 á neðri hæð skólans og var sameinað almenningssafninu þetta sama ár.

Frekari upplýsingar má finna í „Skólasögu Stöðvarfjarðar : 1905-1981“ eftir Björn Hafþór Guðmundsson (útg. 1982).